

3. maj 2017

**Naalackersuisut UKA 2017-mut inuit nunaqarfinni, illoqarfinnilu mikinerni illuliornissamut aningaasaliiffiqarnissaminnut pitsaanerusumik periarfissaqalernissaat pillugu pilersaarusioqqullugit Inatsisartut aalajangiiffissaattut siunnersuut.**

(Inatsisartunut ilaasortaq Bendt B. Kristiansen, Inuit Ataqtigiit).

Inatsisartunut ilaasortap Bendt B. Kristiansen Inuit Ataqtigiit Naalackersuisut inuttaasunut nunaqarfinni illoqarfinnilu mikinerni illuliornissamut aningaasaliiffiqarnissaminnut pitsaanerusumik periarfissaqalernissaat pillugu Inatsisartunut aalajangiiffisassamik siunnersuutaanut soqutiginar-tumut qujaalluta Siumumiik imaattumik oqaaseqassuugut.

Inuup pisinnaatitaaffiitut ilaalluinnarpoq peqqinnartumik toqqissisimanartumillu ineqarnissaq, taamaattumik Kommuuneni sorlermiikkaluaraanniluunniit, nunaqarfimmiikkaanni illoqarfimmiikkaanniluunniit nammineerluni initaarnissamut periarfissaqarnissaat naammassiniarlugu sulinerput Siumumiik ingerlakkatsigu oqaatigerusupparput.

Siunnersuuteqartup nammineerluni oqaatigisaatut innuttaasut ilaannut nammineerluni illutaarsinnaaneq inornartorujussuuvoq. Taamaattumik pisortat annertoorujussuarmik angerlarsimaffeqarnissaq eqqarsaatigalug isumalluutaasorujussuullutik.

Taamatut inissisimaneq piffissami sivisuumi maani oqallisigineqartarpoq. Pisortat inissiaataat allaat ukiorpasuit, ilami ukiut 50-sit angullugit najorneqartarput annikittuaraannarmik iluarsartuunneqartarlutik. Taakkunanilu najugallit akiliuannartartuupput piginnilinnngisaannartarsimallutillu. Aammalu tamakkuupput namminneq illutaarsinnaanerminnut assersuutigalugu 20-20-60 – mik taaneqartartoq atorluguluunniit namminneerlutik illutaarsinnaanngittulluunniit.

Taamaattoqarsinnaannginnera peqquteqarnerpaasarpoq realkredit imaluunniit aningaaseriviit isorliu-nerusuni inoqarfinniluunniit minnerusuni innuttaasut ataavartumik suliffeqarniartarnerat ileqqaa-gaqarpallaartannginneralluunniit ajornarnerummanngooq.

Kisianni siuliani taasattuut inoqarfinni minnerusuni isorliu-nerusuniluunniit inissiani minnerpaamik ukiuni 50-ni najugaqarsimagaanni ullumikkut akiusut naatsorsuutigalugit soorluuna pigilinnngisaan-nagassamut milliuunit koruunit arlallit attartornermut akilerneqarsimassasut.

Nammineerluni illoqalerneq/pigisaqalerneq inoqarfinni minnerusuni isorliu-nerusuniluunniit naju-gaqaannarnissamut aamma qulakkeerinnittarpoq. Tamatumalu aamma kingunerisarpaa inoqarfinni minnerni isorliu-nerusuniluunniit nukiit pisariaqartitat uninngaannartarnerat.

Illoqarnermut tunngasut, angelarsimaffeqarnernut tunngasut piffissaq sivisooq atorlugu maani oqa-llisigisariikkagut uterfiginagit aammalu Naalackersuisut ineqarneq pillugu aaqqissuusseqqinnis-samut tunngasumik saqqummiussassaat utaqqinagu Siumumiik siunnersuut manna taperserlutigu ataatsimiititaliamut susassaqartumut ingerlaqqinnissaa innersuupparput.

Jess Svane  
Siumut